

**CEIS predstavio  
preporuke za  
novog visokog  
predstavnika**

# ŠILING TREBA POMOĆI DA SE usvojene reforme sprovedu

A. ŠUŠNJAR

SARAJEVO - Međunarodna nevladina organizacija Centar za evropske integracione strategije (CEIS) juče je u Sarajevu predstavila preporuke za Kristijana Švarc-Šilinga, novog visokog predstavnika u BiH, u cilju brže integracije BiH u Evropsku uniju.

"Polazimo od toga da je Švarc-Šiling vjerovatno posljednji visoki predstavnik u BiH. Njegovo djelovanje biće odlučujuće u osposoblja-

vanju i jačanju države Bosne i Hercegovine. Novi visoki predstavnik treba što prije da se uključi u proces ustavnih promjena. Nakon novih izbora u BiH visoki predstavnik bi trebao biti lider u novom procesu ustavnih promjena", kazao je Senad Slatina, predsjednik CEIS ogranka u Sarajevu. Istakao je da Šiling treba nastaviti reforme koje je počeo sadašnji visoki predstavnik Pedi Ešdaun i da učini sve u jačanju institucija vlasti u BiH. Kristof Solioz, predsjednik CEIS, kaže da je za BiH najbitnije u ovom

trenutku da se usvojene reforme provedu u praksi.

"Sad je vrijeme za promjene. Novi i posljednji visoki predstavnik u BiH treba prije svega da radi na primjeni dogovorenih reformi u BiH, kao što je reforma policije. Želimo da saradujemo sa novim visokim predstavnikom na ovom planu. Provođenje ovih reformi je bitno kako za bh. građane tako i za cijelu Evropu. Izmjene postojećeg ustava nisu dovoljne i potrebno je raditi na izradi potpuno novog ustava. Taj ustav ne

smiju napisati stranci, nego domaći političari. Novi visoki predstavnik treba sve da učini da iza njega ostane država koja će sama moći odlučivati", kazao je Solioz. Organizacija Centar za Evropske integracione strategije (CEIS) nasljednik je Asocijacije BiH 2005 u kojoj su bili uključeni domaći i strani intelektualci i političari. Centar za Evropske integracione strategije registrovan je u Ženevi, Beču i Sarajevu. Primo predaja dužnosti između Ešdauna i Šilinga planirana je za 31. januar ove godine.